

潞安府志卷二十五

列女上

劉向傳列女以后妃爲首蓋聖女之幽嫺貞靜化及
江漢女子皆以純潔自守曾子固序其書以爲文王
之躬化使然諒哉其言也上黨風土淳厚婦女多尙
節義春秋黎莊夫人漢之中山宋之明德固皆光著
史冊他如縉紳士庶之家或慷慨殉烈或苦志守義
歷代多有其人

國朝旌表節烈更不勝枚舉後之讀志乘者由女子之
行想見俗尙之美推本

聖天子之躬化二南之業不將至今存與作列女志

周

黎莊公夫人衛侯女也旣往而不同欲所務者異未嘗
得見其傳母閔夫人之賢公反不納憐其失意又恐
其已見遣而不以時去謂夫人曰夫婦之道有義則
合無義則去今不得意胡不去乎乃賦詩曰式微式
微胡不歸夫人曰婦人之道一而已矣彼雖不吾以
吾何可以離於婦道乎乃賦詩曰微君之故胡爲乎
中路終執貞一不違婦道以俟君命漢劉歆作頌載

藝文志

漢

孝元馮昭儀潞人奉世女平帝祖母也元帝卽位二年以選入宮後五年就館生男拜爲婕妤寵與傅昭儀等建昭中上幸虎圈鬪獸熊逸出圈攀檻欲上殿左右貴人傅昭儀等皆驚走馮婕妤直前當熊而立左右格殺熊上問人情驚懼何故當前婕妤對曰猛獸得人而止妾恐熊至御坐故以身當之元帝嗟歎以此深驚重焉傅昭儀等皆慚明年夏男立爲信都王尊婕妤爲昭儀成帝初爲信都太后河平中隨王之國後徙中山是爲孝王孝王薨一男嗣爲王有眚病

太后自養視數禱祠解哀帝卽位傳昭儀上尊號因素怨馮太后誣以罪飲藥自殺

前秦

符秦后楊氏慕容永僭位于長子願以爲上夫人楊氏引劍刺之爲永所殺

唐

郝氏元宗在潞潛邸時偶出獵西火鎮郝洽謁見隨幸其第見其女秀整許充後宮

宋

太宗明德李皇后潞州上黨人潞州刺史處耘第二女

開寶中太祖爲太宗聘爲妃旣納幣太平興國三年
始入宮年十九雍熙元年十二月立爲后后性恭謹
莊肅撫育諸子及嬪御甚厚至道二年封后嫡母吳
氏爲衛國太夫人後改封楚國又封后母陳氏爲韓
國太夫人真宗卽位尊爲皇太后居西宮嘉慶殿咸
平二年宰相請別建宮從之四年宮成移居之仍上
宮名曰萬安景德元年年四十五崩謚明德三年十
月祔葬永熙陵與懿德符后同祔太宗廟室

周

羊舌子妻叔姬叔向叔魚之母也羊舌子好正不容于

晉去而之三室之邑邑人相與攘羊而遺之羊舌子
不受叔姬曰夫子居晉不容去之三室之邑又不容
於三室之邑是於夫子不容也不如受之羊舌子受
之曰爲胾與鮒烹之叔姬曰不可南方有鳥名曰乾
吉食其子不擇肉子常不遂今胾與鮒童子也隨大
人而化不可食以不義之肉不若埋之乃盛以甕埋
壚陰後二年攘羊事發都吏至發而視之則其骨存
焉都吏曰君子哉羊舌子不與攘羊矣君子謂叔姬
爲能防害遠疑叔向欲娶夏姬之女叔姬曰吾聞之
有奇福者必有奇禍而有甚美者必有甚惡今是鄭

穆少妃桃子之子子貉之妹也子貉早死無後而天
鍾美於是將必以是大有敗也汝何以爲哉夫有美
物足以移人苟非德義則必有禍叔向懼不敢娶平
公強使娶之生楊食我生時叔姬往視之及堂聞其
號也而還曰豺狼之聲也狼子野心滅羊舌氏者必
是子也遂不肯見及長與祁氏爲亂晉人殺食我羊
舌氏遂滅君子謂叔姬爲能推類叔姬之始生叔魚
也而視之曰是必以賂死及叔魚長卒以貪死叔姬
可謂知矣

趙奢妻括之母也趙王以趙括爲將伐廉頗其母上書

言於王曰括不可使將王曰何以對曰始妾事其父時爲將身所奉飯飲而進食者以十數所友者以百數大王及宗室所賞賜者盡以予軍吏士大夫受命之日不問家事今括一旦爲將東向而朝軍吏無敢仰視之者王所賜金帛歸藏於家而日視便利田宅可買者買之王以爲何如其父父子異心願王勿遣王曰毋置之吾已決矣括母因曰王終遣之卽有如不稱妾得無隨坐乎王許諾趙括旣代廉頗悉餽約束易置軍吏秦將白起聞之縱奇兵佯敗走而絕其糧道分斷其軍爲二士卒離心四十餘日軍餓趙括

出銳卒自搏戰秦軍射殺趙括括軍敗數十萬之衆
悉降秦秦悉坑之趙前後所亡凡四十五萬明年秦
兵遂圍邯鄲歲餘幾不得脫賴楚魏諸侯來救乃得
解邯鄲之圍趙王亦以括母先言竟不誅也

漢

鮑宣妻桓氏之女字少君宣嘗就少君父學父奇其清
苦以女妻之裝送貲賄甚盛宣不悅謂妻曰少君生
富驕習美飾而吾實貧賤不可當禮妻曰大人以先
生修德守約故使賤妾侍執巾櫛旣奉承君子惟命
是從宣笑曰能如是是吾志也妻乃悉歸侍御服飾

更著短布裳與宣共挽鹿車歸鄉里拜姑禮畢提壺
出汲修行婦道鄉邦稱之宣哀帝時官至司隸校尉
子永建武初爲魯郡太守永子昱從容問少君曰太
夫人寧復識挽鹿車時不對曰先姑有言存不忘亡
安不忘危吾焉敢忘乎

附

陸讓母馮氏者上黨人性仁愛有母儀讓卽其孽子也
開皇末爲播州刺史數有聚斂贓貨狼籍爲司馬所
奏案覆得實將就刑馮氏蓬頭垢面詣朝堂數讓羣
於是流涕嗚咽親持盃粥勸讓食旣而上表求哀辭

情甚切帝愍然爲之改容獻皇后甚奇其意致請於
上書侍御史柳彧進曰馮氏母德之至有感行路如
或戮之何以爲勸上於是集京城士庶於朱雀門遣
舍人宣詔曰馮氏以嫡母之德足爲世範慈愛之道
義感神人特宜矜免用獎風俗讓可減死除名復下
詔褒美之賜物五百段集命婦與馮相識以旌寵異

唐

張延賞夫人苗氏宰相苗晉卿女延賞累代台鉉爲女
壻壻莫有入其意者夫人有朗鑑特選韋臯以爲必
貴旣就婚臯性度高曠不拘小節延賞悔之至不齒

禮一門婢僕漸見輕侮夫人待之常厚而抱不平皐妻泣曰韋郎七尺軀學兼文武豈有沉滯於茲爲尊卑見誚而虛擲光陰乎皐乃辭去後權隴石軍事德宗幸奉天西面之功獨居其上帝旋自金吾持節西川以代延賞詭名韓翔去城三十里有報延賞者曰代相公韋皐非韓翔也夫人曰是必韋郎延賞笑曰天下同姓名何限彼韋生應已委棄溝壑安能乘吾位乎夫人曰韋郎昔雖貧賤氣凌霄漢以不屈媚相公因而見尤成事立功必此人也次早入州延賞憂愧曰吾不識人遂潛去皐待夫人過於布素時

李氏邯鄲人李嚴女潞州幕張谷納爲侍人號新聲當
劉從諫潛圖窺脅新聲諫谷曰始天子以從諫爲節
度非有野戰攻城之功直以其父挈齊十二州還天
子去就間未能奪其嗣耳自有潞澤未聞以一縷一
蹄爲天子壽左右皆無賴章武朝數鎮顛覆皆雄才
傑器尙不能固天子恩况從諫擢自兒女手中不以
法得亦宜以不法終君當脫族西去大丈夫勿顧一
飯恩以骨肉腥健兒食言訖悲涕谷不決者三月恐
言泄縊之未幾劉正拒命其下王協等殺正及谷並
夷其族

宋

李氏翰林學士吳育之弟婦駙馬都尉李遵勗妹寡不更嫁御史唐詢因怨育遂奏育不使嫁欲用此誣李
李氏自盡

武時妻宇文氏字文光女早寡靖康末金兵陷黎大肆劫掠兵將脅汚之氏曰我儒家女名門婦肯受辱於汝耶卽墜井死氏父光亦以是日死難

元

程宅妻武氏潞州人夫亡守節不二至元二年旌表平章政事李魏公益書額曰門旌程宅武氏高年耆德

牛贊妻張氏潞州人年十七歸贊二十二夫亡子一遺腹生一女遭兵燹產盡携子女歸依父母父母哀之令改適矢死不從壽八十七而卒觀風者錄其行詔立石於墓表之

皇甫慶妻張氏襄垣人年二十慶卒以死自誓守節不渝至正五年旌表

史諒妻趙氏襄垣人于歸二載諒卒貧無所倚携孤惠居父母所父母諷改適趙曰我忍死至今特以邈孤欲存宗祀之一綫耳如以獸行汙我當卽引繩自縊父母知不可奪止之惠生子嗣宗甫二歲惠卒妻楊

氏守志如姑克昌厥後爲不忝家範云

太常署都監馬懋祖妻張氏壺關人婺居守節閭里賢之

王宣妻郭氏王爲壺關甲族四世同爨宣提領本州稅課時以能稱宣歿郭守節四十年宣從弟宇從姪英俱早逝宇妻李氏守節五十年英妻李氏守節四十年胥以壽終一門三節縣尹郅朗上其事於中書免徭役加憂恤翰林國史院編修趙天麟爲之志

王天祐妻劉氏壺關人將歿囑其婦曰我不幸早逝汝善事我母訓我子母貽我羞劉曰夫天也言不可負

既寡啜粥面墨衣布簪荆事育無愆學正楊雲爲撰
賢孝碑

明

鎮國將軍朱詮錄繼室王氏義門端之女贈光祿卿佐
之妹七歲失恃于歸後相鎮國敬以承志儉以治家
嘗以不及事舅姑爲恨當祭祀蓼蓼如也撫前夫人
女不啻所生及鎮國捐館終身御縞素絕慶吊不禮
賓不精食更嚴於內範子婦謁見先教以孝弟經史
次之著有女範十篇傳誦於世

千戶張英妻王氏英平荆襄戰死朝命護喪歸諭祭葬